

Ákvörðun Aganefndar L.H.

Mál nr. 4/2011

Tekið er fyrir mál nr. 4/2011

Frá yfirdómara á Íslandsmóti fullorðinna sem haldið var dagana 14 – 16 júlí 2011 á Selfossi.

Málsatvik

Samkvæmt kæru voru á Íslandsmótinu starfandi sex dómarar, fimm af þeim voru að dæma samtímis en ákveðið hafði verið í samráði við dómara að einn dómari ætti ávallt frí á milli keppnisgreina. Í úrslitum ákvað yfirdómari að sjötti dómari mundi rita og aðstoða við dómgæslu. Samkvæmt yfirdómara bað hann viðkomandi dómara sem þá átti að vera í „frí“ að rita fyrir annan dómara, en hann hafi neitað að verða við því. Benti yfirdómari þá viðkomandi dómara á að hún væri starfandi dómari á mótinu og skyldi fara að fyrirmælum yfirdómara, en hún hafi svarið „nei“ og gengið í burtu. Ekki hafi ritari verið til staðar og hafi yfirdómari því þurft að kalla eftir aðstoð úr brekkunni. Telji yfirdómari, þetta óásættanleg framkoma á Íslandsmóti og brot á siðareglum HÍDÍ þar sem fjallað er um ábyrgð hestaþróttadómara gagnvart mótshöldurum og öðru starfsfólki mótsins, n.t.t. ákvæðum um að dómari skuli „sýna góða þjónustulund og sinna samskiptum við mótshaldara sem og aðra starfsmenn mótsins samviskusamlega og af virðingu“..... og vera öðrum fyrirmynd í snyrtimennsku og framkomu sem hæfir þeirri virðingu sem starfið á að njóta“.

Gögn málsins

Fyrir liggur tilkynning yfirdómara Gylfa Geirssonar dagsett 18. júlí 2011 sem barst Aganefnd með tölvupósti þann 19. júlí 2011. Einnig liggur fyrir greinargerð Huldu G. Geirsdóttur.

Forsendur Aganefndar LH

Aganefnd LH aflaði sjónarmiða frá Huldu G. Geirsdóttur, en kvartað er undan störfum hennar á mótinu. Barst svar hennar til Aganefnd þann 20 júlí. Hefur Hulda sett fram margvísleg mótæli við málsatvikalýsingu yfirdómara sem þó, með hliðsjón af niðurstöðu málsins þykir ekki ástæða til að reifa frekar.

Í 2. kafla laga og reglna LH, n.t.t. gr. 2.8.7 “Verkefni yfirdómnefndar” kemur fram að yfirdómnefnd skuli senda inn kærur til aganefndar LH eigi síðar en 48 klst. eftir mótslok. Í máli þessu er óumdeilt að Íslandsmóti fullorðinna lauk laugardaginn 16. júlí 2011, en kæra máls þessa barst með tölvupósti til formanns aganefndar LH ekki fyrr en 19. júlí 2011, kl: 16:44. Samkvæmt framangreindu barst kæra vegna starfa umrædds dómara aganefnd eftir að kærufresti lauk. Verður máli þessu því vísað frá nefndinni án efnislegrar niðurstöðu. Einnig er rétt að benda á að til þess að mál sem þessi séu tekin til efnislegrar meðferðar hjá nefndinni þarf að eiga sér stað nánar tiltekin brot á lögum og reglum LH. Ekki er nægjanlegt að vísa til reglna sem gilda um HÍDÍ. Um slík brot fer eftir þeim reglum sem gilda innan þeirra samtaka.

Ákvörðun og viðurlög

Kæru þessari er vísað frá.

Öllum ákvörðunum Aganefndar LH er hægt að áfrýja til dómstóls ÍSÍ.

Reykjavík 21. júlí 2011,

Aganefnd LH

Þorvaldur Sigurðsson

Atli Már Ingólfsson

Sæþór Fannberg